

四庫全書

經部

# 欽定四庫全書

經部  
春秋四傳質卷下

詳校官宗人府府丞<sub>臣</sub>寶鼎

給事中<sub>臣</sub>溫常綬覆勘

總校官降調編修<sub>臣</sub>倉聖脉

校對官中書<sub>臣</sub>宋枋遠

謄錄監生<sub>臣</sub>

許溶

欽定四庫全書

春秋四傳質卷下

明 王介之 撰

宣公

晉趙穿帥師侵崇

趙穿所侵或以為崇或以為柳或以為秦之與或以為天子之邑無可據為定論乃據情勢言之求成於人而伐其與不待智者而知其不可故胡氏曲為之

辭曰穿欲得其權而省庇之是時救陳伐鄭盾不以義舉假穿而使為無益之役功名不立非所以庇族子為羽翼也晉受南陽之地與王田相錯忿而爭之所有必有也承王之賜以有茲新邑乃敢肆其忿忤輒敢加兵于天子之邑而穿無忌之膽力憑盾之威惟其所欲為而為之犯天下之公義而不恤盾之所以用穿穿之所以效于盾者率此也甫脫抱啼之冲人貿貿焉日挾彈以翱翔而不知禍將及已不亦悲乎

故以知穿所侵周之邑也其曰柳者或一地而兩名也若西土之崇文王已滅之矣夫安得復有其國為秦之與國乎

晉趙盾弑其君夷臯

法者先王以明刑弼教本乎天理人情而用之者也罪不可容則法不可赦情有可原則法亦存疑春秋天子之事以天子之法奉天而持天下之平亦此而已矣弑君者覆載不容之惡宮官弗赦之刑也舉而

加之一人之身則必其宜膺顯戮無可矜宥者而後  
鉄之鉄之汚之瀦之而不傷君子之仁恕惡有稱為  
良大夫皎朕事外而使當酷罰者也趙盾弑君穿操  
刃而盾指使之其罪在盾而無可辭也明甚左氏乃  
稱孔子之言曰董狐晉之良史也書法不隱趙盾晉  
之良大夫也為法受惡盾良則狐陷人以罪而不得  
為良矣聖人其姑仍狐之書以為疑案而誣良大夫  
乎是知良大夫之言非夫子之言明矣盾出而穿弑

蓋有盾不出穿不可弑者矣穿弑而盾歸盾之歸弑  
事畢而歸也盾之欲移國柄而以弑君立君立威福  
于國人也非一日矣始則利靈公之幼背先蔑而立  
之繼則忌靈公之威藉趙穿以除之登臺而觀辟彈  
燔熊而戮宰夫居下流而歸以惡不必如斯之甚也  
憚其年少敢為之氣而以私恩結刺客之反戈亡不  
越境以待弑也反不討賊不能背穿也董狐詰之其  
情窮矣抑惡得而不承哉劉裕蕭道成蕭衍朱溫亦

何嘗手白刃以加君而抑可曰良也非賊也乎藉其不然董孤立法已苛而聖人弗為清問浸使夫子在天子之位將聽羅鉗吉網以殺良大夫耶穀梁氏曰子盾見忠臣之至于許止見孝子之至忠孝不至而即陷以不赦之辟則宋督楚願亦將曰吾亦與忠孝不至者均也特不能為大舜比干而已春秋成而亂臣賊子奚懼哉胡氏曰惡莫慘於意非徒意也主是謀也又曰亡而越竟然後君臣之義絕則慶父嘗在



齊矣反而討賊然後臣子之事終則司馬昭嘗討成  
濟朱溫嘗討氏叔琮矣越國以挾鄰之勢殺人以飾  
己之惡是與于不仁之甚者也非聖人直書趙盾弑  
君之法也

螽 大旱

天人之際難言矣以一成之說執象數以言天而天  
道隱人道亦息此劉向父子五行傳所以致遠而泥  
也傳謂螽為虐取于民之效旱為怨咨感傷之應皆

祖五行傳之說也謂天無心則非人之恩怨所能感  
矣謂天有心則君既奪之以虐取天又欲奪之以蟲  
蠃君既困之以死傷天又困之以饑饉罰不及下君  
身而又助君之虐以虐劉百姓是何心耶天之仁愛  
下民猶父母之愛子也有子于此為人剽擊已傷父  
母弗藥弗療而抑褫其衣奪其食乎其謂大軍之後  
必有凶年者攻人者舍穡事而即戎受地者避逃而  
廢業陂池不脩荒萊不墾種植不時稍遇亢暘則苗

槁耳非天以怨咨故而更益之以怨咨也為此說者  
諫臣借天災以警人主使息兵養民耳乃大君遇災  
而懼逢此鞠凶自當惻然念民之疾苦以相天之不  
足而免民于死正無事推測氣數之形似徒追咎于  
既往也王安石謂天變不足畏固邪說矣伸五行傳  
以抑之烏足以服其心哉

衛侯使孫良夫來盟

春秋書涖盟者四來盟者二皆欲盟而不欲往坐致

人之歆也有倨傲不屑往而坐致之者齊于魯是也  
有有所畏忌不敢往而邀其來者公孫敖之泄莒莒  
畏狄叔還之莅鄭鄭畏晉不敢越國而使人乘其虛  
也鄭語孫良夫之來時無四鄰窺伺之憂而坐以邀  
者又有故焉桓宣皆弑逆之賊也桓之立鄭定之脅  
之以求許田而不得不從周班一後而即逢其怒鄭  
突之狡蹕厲于宋魯之間雖嘗與盟于武父而固不  
可信方與盟而更請盟桓不能無疑也故不敢往而

待語之來也宣之篡位所恃者齊耳請昏執玉納賂而女其大夫齊疑釋矣乃交齊愈深則畏晉怒也益甚衛為介紹而終不敢信晉之釋已且恐出疆會衛而晉猝至以執之于壇坫故邀良夫之至與歆而後敢赴黑壤之期焉嗚呼抱慝于心者慚天負地如畫行之鼠見影而卻不必人之捕之也鄭突以庶孽立而位未安趙盾以賊臣當國而威不振此亦何足懼者而噩夢自警待人俯慰有如此者天理之在人心

不容昧也有如此夫衛任其無咎而終見拒于齊盟  
非晉能討之自疑自畏而名人之討耳春秋因事而  
書以責衛之曲徇亂賊而窮宣公懷無畏怯之實也  
胡氏因公卒見辱驗春秋不貴盟之意非所論于宣  
公也

猶釋

孟子曰食而弗愛豕交之也愛而弗敬獸畜之也覲  
面甘心而受此以死者其唯同逆定策之私人乎仲

遂殺適立庶以為德于宣公公不容不報而生賜之  
氏俾世其官宣與遂若保其同逆之相終始矣乃訃  
至之日未聞哀恤繹祭不廢萬入以與賓尸樂之何  
其漠不相關之甚也蓋生而以爵賞酬其私恩食之  
也愛之也終事不繹則以大臣之禮待之敬之也公  
固謂夫遂也吾之鷹犬食之足矣愛之之情且薄而  
何足與言禮敬也繇此思之其未死之日鄙之忌之  
貌合而中離也可知矣梁武之于沈約隋煬之于楊

素宋太宗之于趙普忌其生快其死皆是志也遂將保其首領以終天年而不殄其世其猶幸乎里克死于晉惠傳亮死于宋文尸陳于市而敢望帷蓋之恩耶春秋曰猶繹萬入以示萬世臣子事君而有異志者之顯戒胡氏以失寵遇大臣之禮責宣公之存邪心而不能格不知此猶具是非之心猶亡未盡之餘者奚責焉

陳殺其大夫洩冶



人臣盡忠以諫而至于死亦可以無媿矣死而其言  
驗愈可以無媿矣洩冶之死左氏非之胡氏引伸而  
言之其說何居比干諫而死子曰殷有三仁焉冶之  
仁不能必其如干冶之諫而死夫亦猶行比干之道  
也高哀不義宋公而去宋公弗殺之耳非哀之必求  
生也不死則去之矣魯宣之篡弑惡已成而不可改  
弗庸諫焉為其母弟不忍自我而計不食祿焉潔其  
身而已矣洩冶為陳大夫君之貳也義不可視其淫

昏而不言而陳靈淫昏非有必誅不赦之罪旦悔而  
夕更之身以之全國以之安如之何而弗諫也公固  
曰吾能改之無如治退而寒之者至耳昏亂之朝不  
可仕也治之仕非待株林已賦而後仕也既立乎其  
廷君失德而遂愬然去之惻隱之心亡矣尸位食祿  
以為不可諫而遂杜口以保身羞惡之心亡矣諫諍  
之道初為人君失德而責之臣休明之世君都臣俞  
抑又何所容其廷諍乎左氏曰民之多辟無自立辟

使民而無辟辟亦奚俟其立哉嗚呼死生之際亦大矣處晏安無事之日引繩批根以責古人於無已易也至于主昏于上國亂于下刀鋸鼎鑊且加于身夙昔之謀心不知何往內顧妻孥外謀寵利不得已而與姦邪相比者未可一二數也奈何復重却死諫之臣以貽孔光張禹之口實乎死而書名大夫之正也前書殺治後書徵舒弑君春秋比事以屬辭其予治以忠明矣豈以書名為貶耶

楚子陳侯鄭伯盟于辰陵

辰陵之盟鄭子良曰晉楚無信我焉得有信是何言  
歟而其情實自此見矣楚之徵會但求二國固未嘗曰  
吾將偕汝以討賊也陳鄭之受盟但見脅而從固未  
嘗曰吾將從楚以討賊也未幾而入陳徵申叔之言  
縣之矣未幾而圍鄭徵其君之能下人得國無赦矣  
盟猶不盟也楚果無信而陳鄭亦不以義相從明矣  
楚之主盟于中夏自此盟始春秋謹書之懲楚之橫

惡二國之下喬木而入幽谷也入陳之始有恕詞急討賊也恕止于其事前乎入陳而為此盟後乎入陳而為圍鄭何與於栗門之誅而槩許之

楚子圍鄭

賞必當其功刑必如其罪故曰刑賞忠厚之至無溢喜無溢怒不為已甚之謂也一行之瑕遂以累及沒齒一節之善遂以盖其生平聖人其為已甚乎楚莊借少西之義問肆啟疆之雄心當其事君子猶弗過

許焉奈何溢其喜而為皇門之役解其憑陵之罪也  
春秋言圍不言入則自有說入者急詞也遽而直造  
其國都無可禦者也圍者緩詞也經時環攻而未下  
可以救者也晉優游河上坐失事機不急拯鄭危以  
解其圍使鄭君臣哭臨於廟不得已而降楚迫乎子  
良質潘阼盟乃始南轅而猶參差退縮使孤憤之一  
軍以取敗故書圍者形晉之不足為盟主也非以寬  
楚之爰書而揜其惡也胡氏曰近在王都猶從末減

則殺一徵舒而下三川移九鼎剿絕宗周之大命亦  
可許以義而為之末減乎討賊大義也而孟子曰惟  
天吏則可以伐之今有殺人者有司弗能問而虎食  
之遂將晉虎于堂而奉以為吏哉故蔡般陳招惡劇  
于州舒而春秋不為楚虔貸明夫討賊之義必以其  
類而後可舉也蠢爾荆蠻唯玉帛子女之是志土地  
人民之是謀而為蠹賊于內如孔寧儀行父者假之  
以義導之以逞國幸存則為功于陳國即亡又可為

功于楚故陳且縣夏州已俘而二姦仍保其富貴此  
君子所為痛心疾首抱憤于千秋者也而更為獎楚以  
擒寧行父之大姦乎嗚呼劉琨之忠也而假權于段  
氏功不立而身殞君子惜其不知義也蕭寶夤依拓  
跋以反攻梁王琳附高齊以攻陳故國不興而身且  
北面其究也寶夤授首于關中王琳滅宗于淮右天  
之降罰不爽也聖人奉天以行法而豈其以殺一忿  
戾凶愚之賊子遂不勝其喜盡取其惡而矜宥之也



胡氏之論不亦過乎

宋人及楚人平

宋楚之平左氏曰華元登子反之牀而起之是與曹沫操劍而刼盟者同一弗獲已而以死刼之之計古人受刼而不能背其重然諾畏鬼神大槩然也公羊以為乘闥而語相告以情實而相勉以君子楚莊為君側為相睥睨中國欲剪滅之以問周鼎何恤乎億何慕乎君子元其敢輕以情實相告而楚其肯以虛

名廢垂成之實利乎公羊之言兒戲之說也胡氏據之以為論斷誤矣夫中國有可伸之大義而以貴大夫行曹沫荊軻之事胡氏以為貶之也似也然亦論其時而已宋受重困食絕於內援絕於外欲戰而饑疲之卒不可用欲成而肉袒之羞不可忍弗獲已而以身試不測之險劫其主帥而與之同死側不得不從莊亦畏其必死之心而不得不聽退舍三十里以盟而免城下之辱藺相如欲以頸血濺秦王於澠池

張良使樊噲擁盾以劫項王皆此道也若如胡氏之詞  
莊果賢側果忠則徼幸以濟矣不然對虎狼而戒以  
人之不可食豈不為天下笑乎至謂子反之不論命  
則尤非也受劫于人而待君之命刃已劉其胸矣是  
元有功而側固無罪也于斯時也宋國之勢岌岌乎  
殆矣故春秋非獎刺客之書而于此有取焉聖人之  
難也書曰宋人及楚人平人衆詞國所依也平者平  
詞也宋無所屈也以宋及之者平不平權在宋也

公會晉侯衛侯曹伯邾子同盟于斷道

凡書同者必有其不同者矣。靳靳然同其所同而不  
同其所不同之辭也。是故首止、葵丘、翟泉、踐土皆不  
言同。書有年可以知他年之歟。書六羽可以知他廟  
之八。此春秋之微詞也。于幽于蒲于平丘魯弗同也。  
于新城蔡弗同也。于清丘衛弗同也。于蟲牢宋弗同  
也。于馬陵于柯陵于雞澤鄭弗同也。然則斷道之盟  
其為齊之不同可知矣。其不同者何？齊爭霸也。行人

微會房帷笑客齊之睥睨晉而思與代興明矣是故  
不與于會而使者且止于中塗由是侵衛伐魯力爭  
諸侯至于鞍之敗而後止皆爭霸之實也前乎齊桓  
中國無霸桓創而晉襲之齊以為吾豈為晉先驅者  
哉忿忮生而思復其故爭所以不能已也前乎項公孝  
公爭之後乎頃公霸公爭之莊公爭之景公繼爭之  
至于悼簡之衰而爭猶未已間亦姑屈于晉而忮忌  
終不忘也乃爭之而卒不得者何也齊以為霸者吾

之世業矣晉可世吾亦可世而抑知其不敵者不在  
諸侯之從違而在國中之不靖乎桓公五子而四子  
相踵以相奪羣臣之志不定萬民之情不安司馬氏  
有天下再傳而大亂況列國之相雄長而欲人之奉  
已其可得乎夫齊而有勿忘先業之志歟無亦輯寧  
爾兄弟綏撫余臣民待晉之衰而布恩信于天下不  
此之務而唯力是爭晉方世紹其業日與諸侯周旋  
拒楚而懷忿忮以爭之其危辱也不亦宜乎景公承

晉之敝而修鄆陵之盟急沙咸牽洮之好蓋為愈矣  
乃有晏子而不能用且晏子者又儉不中禮成乎規  
模之狹隘者也既不足以生諸侯之敬忌而且君移  
柄于權臣父偏私于愛子徒以激天下之媚忌艾陵  
敗而國敝于勾吳齊遂以終失其伯而天下亦因齊  
之爭以解散吳越內訌三晉瓜分宗周無恃以存而  
成乎戰國爭伯之為害也亦烈矣哉春秋惡齊之甚  
于斷道書曰同以見齊之不同亦祇以異而為亂首

也若曰諸侯同心謀欲伐齊則郤克抱憤亦屢請而弗許矣內不能同其國人而況諸侯哉

成公

季孫行父臧孫許叔孫僑如公孫嬰齊帥師會晉郤克衛孫良夫曹公子首及齊侯戰于鞞齊師敗績

史家之說非目見耳聞資之於傳聞而流俗之言亂之苟不以理裁之必陷于誣三傳傳經而記事則史也故皆有誣焉左氏之誣多在鬼神災祥之異公穀



之異則在人事委曲之情誣在鬼神者其說幻忽而不可測而或可借之以設教誣在人事者適足資讀者之笑而弗能為鑒戒公穀之說戰鞍其尤已齊之得罪于晉與爭伯也其結怨于魯衛侵伐不一使之失地而喪師也故合謀殫力以致死而必挫之即有婦人笑客之事亦其凌蔑晉霸而辱其使以示無懼耳而公穀增飾其說以為或跛或眇或禿或僂使如其狀者御之以為笑資此適足為讀者諧噱之具爾

而豈其然哉人之有廢疾不數數然也烏有一時四國之卿相聚一堂而各居一醜惡之狀即使然矣齊廷之上又安得有此四人恰與相肖而御之且列國之相聘各有差等送逆車步之遠近儼介之多少饗食燕飧之厚薄幣帛庭實之輕重不一也主君延而見之不可一日而旅見故荀庚孫良夫之至魯君臣議其先後聘與盟日各異也晉伯主曹小國未有相偕而入門者縱齊頃欲以辱晉而夷之於曹卻克之

傲其肯聽命而羣超乎況齊頃雖不量力以爭勝然  
觀其既敗以後弔死問疾七年不飲酒不御內則亦  
非挾童心以供婦人之歡者而何為其然耶鞍之戰  
齊晉興替魯衛安危之機也備書四卿與列國之大  
夫以見當日公憤同力之情事奈之何以戲笑之俗  
傳亂之

取汶陽田

春秋之世三代之澤將斬封建之法將亡之日也必

欲立一王之制以定諸侯之封域則必有明天子起  
坐明堂朝諸侯議禮制度乃可正強者之兼并按山  
川而各畫其封守乃其能宰制六合使震疊于威靈  
而不敢競抑必先之以誅暴禁亂之天誅則于時必  
有勲賢之輔受茅土之封而取足于諸侯所侵之地  
非可規然按先王之版藉以固守之也古之萬國至  
周初而五存其一至春秋而見于經傳者百二十四  
其僻處而弱小不見於經傳者必無幾也則列國之

疆域已不可問矣如晉反魯之侵地而因以取汶陽之田斯田也魯以之封季友在數十年以內也前此者為齊地乎為魯地乎且非齊非魯而為已滅之國乎齊以是反于魯魯必請之天王則使非齊非魯而為亡國之墟其子孫之有無不可問即幸存焉而降為編氓已不可為人君又將何以處之周室而既陵矣非魯一旦以虛名一請而可返共主之權也魯即請之晉固不聽之晉即聽之恐周亦不敢任之周即

任之亦以虛名聊應之而固不能為有無矣荆吳僭  
王而不能革陸渾之戎近在王畿而不能驅南陽之  
田晉以兵力取之而不能禁滅國者數十而不能復  
乃一田之微明明齊侵而魯復之而責其不按故府  
以辭受乎正天下者道也非徒法也齊威王朝周而  
為天下笑實不至而務其名耳故使孔子而為東周  
必有宰制之大用即當日之天下而釐正之非但徇  
名迹以尊王室徇名迹者未有能尊王室者也夾谷

之會齊人歸田以謝過夫子受之而不聞請正于周府然則獨以責成公行父而不自責乎知此則知聖人經理天下之大權不在區區請命之間也

公會楚公子嬰齊于蜀

傳譏季文子肆忿忮之褊心而不能懲忿窒慾以取辱夫季孫實不能無罪而不可以此責之也以禿御禿而致忿傳者之訛耳魯背齊而結晉齊將出楚師以伐魯為日久矣赤棘受盟臧孫急繼守備未幾而

齊兵壓境取龍矣侵及巢丘矣魯欲弗忿而不可得矣此敵加于已不得已而應者也非忿之不懲也乃若魯之不道以致辱則說在恒之九三矣不恒其德或承之羞謂吳順極而處震動之下皇皇四顧不克自持以成風雷倏忽之勢德之不恒也或之者疑之之也疑于羞而展轉以思免然而羞卒承之弗能避之也躁人之無恒氣不抑也愼人之無恒志不固也其足以承羞則一也行父魯所恃為社稷之臣也楚



自入春秋以來未嘗有一矢之加于魯而何為惴惴然貽君父以致賂納質之羞乎行父三思而行者此正其三思之害非忿之不懲也魯之依霸而戴之舊矣故楚禍不及而國以小康乃行父當國以來謀為宣公定其篡位舍晉而亟事齊已而頃公不逞卻克怒知齊之不可終恃矣又背齊而走晉倏合倏離占風候氣以為從違自謂審之熟而知幾早乃齊怨既深楚抑知其隨風而靡之可多得志也如之何不脅

之以威而恣其無已之求也蔡昭背楚誑吳卒致州  
來之哭司馬欣反楚背漢卒致汜水之劉魏豹死于  
孤城呂布殺于急縛其左顧右盼以無定情夫豈躁  
而不恤禍哉沈思而得游移之術以為苟全之智皆憂  
疑太深進退失據人不信天不佑而死為天下僂者  
也春秋于侵蜀之師諱而不書甚為魯恥之也恥其  
思屢變而無恒以召侮夫豈忿之無懲哉

叔孫僑如帥師圍棘

胡氏謂魯初稅畝作丘甲棘不願為之氓故勞大師以圍之其說是矣乃齊自桓公以來變周之制棄太公之法頃公用兵已急征徭繁數豈能恤民而使民依之以不忘者乎齊猶魯也何愛于齊而背其故主也于是而歎亂世之民蹙蹙靡騁從違不以其心既危其身家又喪其忠孝大可恨而又深可憫也弱者失之強者攫之強者攫之弱者又爭之爭之不得假人之勢以圖之圖之既得又不能自強而為衆庶之

馮依岌岌然且將復失之則其民將何挾以自存而何恃以相親其躊躇于笑啼不敢之時亦可為痛哭也矣勾踐臥薪嘗膽而吳終為沼燕昭卑躬下士而盡復故疆民亦有心孰不願得故主而君之特無如其不能終保者何也棘本魯地齊以強取之而使已屬魯君臣而能憤起有為折齊而下之使歸已焉民之從之如流水固人情也乃已之不振受兵而恒懼假晉之威以獲无妄之福楚師一臨于蜀惴惴焉納

賂質子之不遑魯之不能終有棘也較然矣齊侯不  
御酒內決意于雪恥棘之人聞之而惴惴一旦舍強  
大而納賦於魯庭他日之隱憂民雖愚其慮之也必  
深也父老顰眉而相語子弟翹首而東望于是為觀  
望之術者進曰待其圍而後下他日可以謝齊圍焉  
而下之却可以謝魯嗚呼土吾土也民吾民也胡然  
使彼持兩端而視我如陷阱弱國之君臣衆疑親叛  
漠然無丘隴之情亦使其民而至于若此哉書圍棘

而棘人之忘忠孝親仇讐牾喪其良心者見矣魯之君不君臣不臣無能鎮撫其先世之遺民亦見矣自非志士孰能忘禍福以依君親故曰可恨而亦可憫也

梁山崩

左氏載絳人之言降服乘縵徹樂出次祝檠史辭以禮焉而又足之曰其如此而已雖伯宗若之何其言正矣為此以盡修省之文而生其引咎責躬之心人君

敬天以彌災如是焉得矣穀梁謂壅河三日不流輦者曰君親素縞帥羣臣而哭之既而祠焉則流何其誕也山之崩也以為朽壤之偶然歟則無所為而壅者固不以有所為而流以為君失德而致災歟則畏天以實非縞素祠哭之虛文所可格也三日而流者新潰之土不堅漲極而激湍浸灌必復決也乃哭之祠之棄人崇鬼巫覡之術而欲名山大川之我聽必不然之數也其說昌而淫祀興風俗壞誠敬弛政教廢

幽明失理非細故也二傳之誣甚于左氏于此信矣

立武宮

左氏謂以鞍之戰故立武宮而曰聽于人以救難不  
可以立武似謂宮非以祀武公而為別宮以誇勝績乃  
以廢宮桓宮僖宮之例求之而證以有事武宮之文  
其言非也故胡氏決為武公之廟而示即遠有終之  
義以譏之是矣而猶未盡也周制天子七廟有文武  
之世室焉魯初祖周公而祀伯禽于世室世室一而



已雖僭而猶不敢與天子等也至是乃更尊武公等  
之于武王而等魯公于文王則世室二而純乎天子  
矣世室者不祧者也故至于昭公尚有事焉故明堂  
位曰魯公之廟文世室也武宮武世室也魯之郊禘  
非禮久矣至此而一一皆與周匹是未有代德而有  
二王其僭為已極矣故書曰立立者不宜立也煬宮  
因季氏之私禱而建故曰作以見其妄作此以本非  
所得而立故曰立以見其誣而僭立一字之貶聖人

之意存焉非但世遠宜祧之謂也

取鄆

取鄆取鄆取鄆或以為國或以為邾莒之邑以經文考之則信其為邑而非國也國之曰滅廢其君毀其宗廟社稷不復有是國之謂也言取以諱國惡則彼受滅之國斬先祖之祀蔑先王之封其可閔傷者不顯非春秋經世之義矣取者于彼未亡而我有之也無社稷之守則雖易主而邑猶是邑也國則不可言

取也且使鄆鄆而為國也魯滅之為已有必其地相  
鄰矣乃自成公以上入春秋者百有餘年而覲問盟  
會侵伐槩不見于經傳則以知天下之固無此國矣  
唯鄆為東海之小邦而莒滅之為已邑取之者取莒  
邑而非滅鄆子之國也國之存亡封建之興廢事莫  
大焉為國諱惡婉以紀之可耳惡容視先王分茅胙  
土之侯服為一彼一此任人取與之下邑乎

叔孫僑如會晉士燮齊人邾人伐鄆

晉方通吳而吳即伐其與何也吳為封豕長蛇棄信而無厭方欲通晉以敵楚而既通乎晉即睥睨東諸侯而蠶食之其為匪人之情固然也晉方通吳而即與吳爭鄭何也吳進而即與晉爭諸侯自不容已于與爭既發其釁乃畏其焚林而撲之既決其防乃畏其滔天而湮之愚昧者之情固如此其不定也爭諸侯而僅合齊魯邾之兵何也鄭者三國之外蔽鄭亡而吳兵加乎三國晉不成乎霸矣故急請晉爭之而

與偕也晉為魯謀而魯請緩師何也魯之從霸非心服之畏其強耳吳強則又畏吳吳兵未加于境則恐怒吳而挑之釁也其勤兵以爭為人謀固其疆圉而人心不固者晉之通吳自貽伊戚及是而悔之晚矣唐召回紇以討安史而兩京受其塗炭宋約金人以滅契丹而二帝為其俘獲晉不慮患于早而魯懷異志于後幸一時制楚之利偷目前免吳之憂他日者召國君徵百牢爭長于黃池皆啓之也胡氏徒譏其

無恤小之義徇大國之令未足以盡其愆也

三國來媵

魯宋侯國也嫁女而三國媵之娶婦而備十二女傳  
謂備書以欲敗禮而逾制大義盡于此矣而取公羊  
錄伯姬之說謂因貶以見褒夫賢而可褒其逾禮則  
子路使門人為臣以昭孔子之德而何以責之為欺  
天也賢不肖無定者也故不肖而或有一事之得不  
于其得而譏之賢而有一行之非不于其非獎之宋

魯所以待伯姬伯姬所以自處亂人之道也何足以見伯姬之賢乎夫宋之為此有說矣以為吾先代之後可郊可禘而何不可同于天子之納后乃周先王之以天子之禮樂修其事守者為成湯存配天之德也非使其子孫儼然與天子敵禮也華元當國以來欺周之衰而僭踰無紀蜃炭翰檜見譏于君子久矣借書之以閔周之下移而宋君臣之不臣也何褒也齊之僭自管仲始之而封侯建國魯之僭自臧辰啓

之而立五門列三頌宋之僭自華元導之而盛昏禮  
備塋儀強大夫欲自僭以視諸侯而收其實利乃惑  
其君以僭天子而竊其虛名虛名得而實利喪諸侯  
之愚春秋之所深惡而重傷之也

公會晉侯宋公衛侯曹伯伐鄭

君存而世子立後世之亂法春秋時尚未有也晉景  
之卒在六月經偶闕月耳伐鄭以五月其為景公明  
矣而左氏謂齊侯有疾立太子州蒲為君以伐鄭將



州蒲遂端冕臨戎而以侯禮諸侯乎則置景公于何地也州蒲既為君而稱晉侯矣孺之卒又書晉侯名實亂而無辨夫子修經何不是正之也或景公負疾而出使太子從焉以代行軍禮所謂守曰監國從曰撫軍而傳聞之譌遂以州蒲為君耳肅宗靈武之立為千古不孝之口實趙汝愚之立嘉王以貴戚易位之道廢不孝之光宗不得已之權也而且肅宗既立玄宗稱太上皇而不復稱帝宋之三世內禪其崩也

皆曰太上天無二日不容有二君也趙武靈亦稱主  
父不稱王矣此義不明則魏主燾周主贇以恣其妄  
自尊大之私心而苗傳劉正彥之逆亦託之以逞傳  
經而失實鮮不為名教累也

晉人執季孫行父舍之于莒丘

行父僑如之乍屈乍伸也晉無君魯無君惟其大夫  
之自為朋黨已耳國有朋黨而亂奚有定哉自其相  
恃以各為黨者言之郤氏忌蔑行父而欲削之以收

魯欒范惡僑如而欲安魯以事晉得失分焉而行父之執僑如之張唯郤氏行父之釋僑如之遂唯欒范晉君無能決焉故曰晉無君也僑如託三郤以逞君且為之辱卿且為之執有外援之助而不知有君行父託欒范以免公子唯其刺國母唯其禁有外援之助而內不假于君命故曰魯無君也僑如之以動郤犇者曰魯有季孟猶晉之有欒范犇妬欒范而因以妬季孟繫行父即如其累欒范而僑如與犇內外之

黨成矣已而釋行父者果欒范也僑如之言終驗而  
欒范之必釋行父者亦聞僑如之言而惻然曰魯之  
有季孟猶吾二族之在晉何容聽其廢而以長僑如  
者長三郤乎而欒范與季孟之黨又固矣三郤欒范  
爭權于內而魯之三卿興廢于外國中分黨而內外  
為朋友相忮以相賊皆欲奪君權以歸已其忮也國  
之所以分也郤氏以季孟之如欒范故而欲逐之欒  
范以季孟之猶已而必釋之已成乎兩不相下之勢

則他日者三郤授首而欒范當為之一快然而勾與  
書終以是怨厲公必弑之以為三郤報陳尸之怨欒  
范豈私三郤者哉其心曰今日之所以處三郤者即  
他日之所以處欒范也不殺厲公而大夫之死生終  
制于君手矣僑如之惡甚矣君且為之辱卿且為之  
執其于季孟已成乎兩不並存之勢則欒范為援成  
公往會季孟之勢得而僑如窮矣然則奪叔孫氏之  
世使永廢于魯也季孟當不遺餘力然而國母可幽

公子可刺而僞如安驅以出且使其支子相襲而為卿季孟豈受僞如哉其心曰今日之不可廢叔孫者即他日之必不可廢季孟也誅僞如而奪其世官而大夫之廢置終制于君手矣雖相怨而必相庇互為援植以固其權其庇也君之所以孤也夫然晉與魯安得有君哉荀范智氏滅而三卿廢靖公為家人昭公討季氏而叔孟交起以攻公徒或相收或相庇朋黨固結而不可解魯晉之覆軌施于漢唐宋而未息

朋黨之可畏烈矣哉

齊高無咎出奔莒

左氏稱仲尼之言曰鮑子之智不如葵葵猶能衛其足殆非夫子之言也不然則如速貧速朽之說夫子自以他故譏鮑子而左氏傳聞不審以持祿容身為聖人之正訓也子曰邦無道危行言孫謂處事外而持清議非愛身存道之智耳鮑氏自叔牙以來為齊之世臣休戚與共而清宮禁肅僚窻以靖國家其職

也其道也即其不容委之責也愛克亂于宮中乘輦以入于閤僑如以之辱君于晉宋鮑以之弑君而立是可含默不言以坐視傾危之至乎徒以衛足為智也則全軀保妻子之臣附嫪毐以媚不韋比蓮花而諛昌宗者皆聖人之所謂智矣葵有衛足之智抑有向日之忠忠與智相扶以成德者也故曰此非夫子之言不然必他有所謂而非以持祿容身為智也

晉弑其君州蒲



稱國以弑泰山孫氏明復曰舉國之衆皆可殺是也  
所謂衆者當國之大臣繼主之嗣君之謂非統編毗  
而言之而傳者致疑于三晉半天下以為淫刑者不  
達于孫氏之旨也薛之弑比事無傳焉莒僕之逆滔  
天而國人是因吳光之隙已深而國人共戴莒吳之  
人奚所逃罪在官者殺無赦而況協謀以逞乎厲公  
之弑中行偃實為賊魁以車一乘莖於翼東門之外  
死猶不解其怒固莫可分惡于衆也乃樂書與之同

刼同辭同稽首于廷使程滑者書為主而偃與偕  
書之為戎首又不得而辭也鄭公子宋弑君謀于歸  
生持兩端而有畜老憚殺之言春秋舉大逆而歸刑  
于歸生以懷逆而姑避者其心憎也偃書召士匄而  
士匄辭召韓厥而韓厥辭殺牛莫尸之說猶歸生也  
不討賊不越竟不直詞以止其惡而嫁罪于人君子之  
所必誅不赦者則匄也厥也歸生趙盾之辟所不能  
逭也厲公弑矣周子立矣厥匄偃書相繼以將中軍

而不相下則其同謀操刀於先而送主晉政於後無首  
無從一而已矣豈徒書偃勾厥哉自知螫以降六官之  
長幸厲公之死以受新命者亦不但在官勿赦之科  
也周子幸先君之弑立乎其位而行賞功之典罰弗  
及焉亦魯桓宣之等也故曰舉國之衆皆可殺孫氏  
之言豈過哉胡氏曰深求其旨知聖人誅亂討賊之  
大要亦此意歟穀梁舍惡不治獨咎君惡之甚夫君  
而見殺必有瑕矣臣而弑君必有辭矣然則必為天

子如武丁成王為諸侯如丁公衛武而後弑之者始服汙瀆之刑乎誠其為武丁成王丁公衛武也又孰得而弑之也

襄公

遂成虎牢 戊鄭虎牢

善制敵者不求大勝而為其不可敗善立功者不求速成而為其不可毀善謀國者不求亟安而為其不可危善交鄰者不求縣合而為其不可離晉悼公其

知此矣其初入而嗣立當君臣交攜上戡下弑之餘而外有齊秦吳楚之交相向也乃清源數語以無心嗣服之坦衷立主綱以折羣黨既乃命官收譽修德恤民內已靖而後勤外畧馳士匄之詞而齊定從嘉父之謀而我服權通吳以制楚既屈楚而辭吳舍新軍以革僭勤聘問以睦鄰皆從容不迫持之定而謀之不爽易曰其亡其亡繫于苞桑握之固也詩曰不敢暴虎不敢馮河制之緩也悼公有之而其城虎牢

而戍之尤足以見其審慮之密而規模之宏遠焉自  
齊桓以來霸中國者之爭鄭久矣或頓兵城下以脅  
之或蹀血中原以爭之乃陘亭已服楚而鄭為首止  
之逃城濮已敗楚而鄭猶取汜水之討近者鄢陵之  
挫晉威張矣鄭終懷集矢之恩而依楚不舍無他晉  
遠阻并汾隔以大河限以太行南下而有事于鄭也  
難故鄭欺其不易出而恐其難終恃也虎牢者大河  
之南太行之東迫鄭而拊其背者也城之戍之則鄭

背我以合楚而攻之也易鄭親我而楚攻之我起而救之也亦易不亟與楚爭一旦之雌雄不迫以求鄭乍時之屈服則鄭雖有晨變盟而夕寒言之狡計亦無所容其反覆則是役也不必有召陵城濮赫赫之功而收鄭于指掌為計決矣鄭貳則為我屯牧之地鄭服則為鄭指臂之援乃卒以收二十七年鄭人歸命之績而楚不敢北向以爭中國其為經綸天下之大略蓋春秋二百四十二年未有之殊猷也趙充國

曰帝王之師出萬全悼公允矣春秋于悼公制楚服鄭之事書之重詞之複繁而不殺其予悼者至矣鄭未服則虎牢為南北之要樞城而不繫鄭者所以旌悼公之功為天下城之功不僅在鄭也鄭已服則虎牢為鄭之憑藉成而繫之鄭者所以白晉之未嘗私虎牢而為鄭計深遠也一字之增損悼公之訐謏見而其無所奪于鄭之心亦著矣胡氏以扼險逼鄭少之將失險以聽鄭之南嚮楚之北犯而後為得乎若



穀梁氏以伐喪責晉却不念鄭伯踰將死之言為鄭  
叛服不定之大機不可失也哉聖人之所予傳者之  
所奪吾不知也

諸侯之大夫及陳袁僑如盟

禮也者體也無禮則無以為體失其體則禮廢矣夫  
招攜懷遠之以禮為重決矣體者肢幹強固而筋脉  
柔和以利用而正焉者也太剛則折太柔則靡合其  
宜而居正以正人不亦難乎陳自辰陵即楚以來不

通中國者三十年矣雞澤之會心儀悼公之賢復霸  
中國而思納款乃其君猶首鼠兩端不躬從會而屬  
命于一介之使其情未定也于斯時也惡其不敏而  
拒之拒之得矣而絕之已甚非懷集之量也矜其已  
愚而納之納之可矣而納之踰量非至德之威也故  
拒之不得則且屈列國元侯與一大夫定交於盤敦  
之間自失其體而陳愈驕驕愈不保其不叛也于是  
而使大夫與之盟弗拒也弗輕納也聊如其來而待

之耳若置之可來可不來而無驚喜匆遑之色此之謂有體此之謂有禮此之謂居正以正人而穀梁以爲失正也何居

莒人滅鄆

毀其宗廟社稷曰滅滅則自此而無有此國矣立異姓以爲後君其國者非其苗裔神不歆非類已姓之祀移矣然宗祧猶然鄆之先世也社稷猶然鄆之茅土也鄆氏之夫子猶然爲公族也職貢猶通于上國

會盟征伐猶列于五等也臣民猶有所戴而不以為  
俘也遽為之名曰滅名實交亂史氏如此且不足以  
為信史聖人作春秋定大法而舞一字之深文以相  
加哉呂非嬴而仍秦牛非馬而仍晉柴非郭而仍周  
可云嬴氏司馬氏郭氏之亡而不可云秦晉周之滅  
使可云滅漢祖入關而子嬰降劉裕篡立而德文弑  
陳橋擁立而柴氏廢又將何辭以加之乎然則莒人  
滅鄆果興師破其國而滅之左氏特賂之說是也鄆

近莒而莒圖鄆非一日矣鄆不能支而屬于魯魯不能庇而歸于晉魯弱而不能撫晉遠而不能救莒于是奄而有之為已下邑魯不平而復取之于此書滅于後書取亦既章章矣公穀之說巧而誣焉足信乎上書鄆世子巫矣何復有異姓以干之者巫即異姓之子乎則此書滅以甚其罪而前何予以世子之名使非巫而別有異姓之子乎此世子巫未嘗殺未嘗廢而何往耶滅鄆之後鄆不復見于經二傳不考始

終而強為之說亦至是哉

鄭伯髡頑如會未見諸侯丙戌卒于鄆

髡頑之卒與弑不可得而審也左氏謂子駟使賊夜弑之而以瘡疾赴于諸侯舊史不能明言其弑聖人不輕以傳聞定人不赦之辟其說亦通而公羊曰為中國諱穀梁曰不使夷狄之民加中國之君則是舊史本書弑而聖人故諱之以書卒信然則亂臣賊子唯弑無道之君乃膺官官之辟君而賢也可唯其弑

而姑貸之豈理也哉其云子駟欲從楚僖公不欲以此而見弑非也成公將卒子駟請息肩于晉矣從晉者子駟之志也何至此而忌僖公之如會耶且僖公弑矣諸大夫可行其志矣何復侵蔡以怒楚而終受盟于晉乎意者駢自以不禮之故甘心于君父未敢正告同朝唯與罕豐之黨密謀操刀其以瘡疾赴也必於丙戌之前已弑矣又偽以疾稱且有求醫禱祀之事以文飾之至于丙戌而後曰不可起也乃從行

之士卒鄴邑之編氓或有與聞而私相告語者于是  
裨官野史或為紀載而三傳因之若聖人因魯史作  
春秋闕疑而慎言之固不徇道路之口輕加人以覆  
載不容之罪然特起未見諸侯之文則隱然有死不  
可知但憑其赴之意矣宋太祖之崩也有戳雪之疑  
當宋世而傳之矣然使修史者直信而書之曰光義  
弑其君抑豈可哉寧失不經勿殺不辜聖人之慎聖  
人之忠恕也



作三軍

作三軍為季氏之攘國此一說也而不盡然也魯舊有二軍而三之一軍一卿則叔孟二氏與季鬲足而立而季氏之權損也宿何利為此而叔孫豹何不欲也春秋軍賦之制會盟征伐所出之車乘卒徒幣帛饗餼皆視此以為輕重故子產爭小國之賦自旦至昏而必欲自損悼公之世征伐方勤奔命蓋不遑矣季孫宿猶矜然自大以駕列侯之上而虛國以疲民故

叔孫豹曰子將不堪惡宿之病國也三家之專魯自  
文宣而已然不待今日也至于意如當國愈攘奪以  
自強而舍之則三軍之作舍無與于季之專不專明  
矣魯頌之詩曰公車千乘其甲士步卒當七萬二千  
人用其半休其半而曰公徒三萬然徒雖逾于二軍  
而不盡用之以從三軍之制所以息民而裕國也三  
軍之作國已勞民已敝書作者謀國之不臧也若季  
之盡征則又因事而行私作而季不益舍而季不損

非僭擅也傳者未攷焉

同盟于亳城北

屢盟而數背背可惡也而因背以成其嚮未可惡也  
棄信勤兵以勸民非善謀也而因勞以求其逸謀亦  
未嘗不善也晉鄭之合離晉與鄭自謀之自知之而  
其迹則若顛倒無術而詐諉已甚者三分四軍以困  
楚而收鄭晉君之成算也舍之固已測之審矣晉曰  
於我未病舍之曰晉能驟來晉曰楚不能矣舍之曰

楚將不能不啻桴鼓之相應符券之相合也楚疲矣  
鄭之從楚可以質楚而無歎矣至于蕭魚之會禮囚  
納堠皆如其志之所期而前之忽晉忽楚乍降乍叛  
者晉亦深諒之而知鄭之非狡矣使其不然晉難不  
深楚勞未艾縱偷旦夕之安而欲二十四年晏然北  
向楚之不能以一矢相遺其可得乎以欲翕固張之  
術行背荆同華之志大信在我何恤人言七姓十二  
國之祖自鑒我委曲以求合于晉之深哀雖千重誓

而不顧勞民爭戰不遑寧處而不恤非叛也非勞也  
所以固其交而謀大逸也春秋于鄭之侵宋稱爵稱  
大夫稱帥師而無貶辭知其不以叛盟罪鄭也亳北  
之誓守以蕭魚庸何傷

叔孫豹會晉荀偃齊人宋人衛北宮括鄭公孫薑曹人莒  
人邾人滕人薛人杞人小邾人伐秦

齊崔杼宋華閱沒其名氏而以人稱左氏曰情也情  
者其迹而有所以情之心春秋誅其心而重貶之非

但在儀容進反之間也晉之失伯三世矣其抗衡而欲蔑伯者非但楚也齊挾其伯之餘業而收魯以長于東方秦恃西戎之伯而日修怨于河外晉有三方之釁久矣宋懲易子析骸之禍戴晉而無固志又晉之所為內患也悼公起而張之抑楚收鄭而拒吳東方靖矣乃西問秦罪而責士雅樂禍不止之辜中原之禍在秦不容不討也晉之濟涇以深入安危之機在焉崔杼華閱次且河上以沮軍心夫豈憚勞而已

哉以為東方之國唯吾二國為大耳進則諸大夫承  
我而興退則晉人且因我而沮使其如北宮括公孫  
蠆之決志以從荀偃之馬首樂鍼士鞅之銳氣得輔  
而昌樂厲之猜離不足以逞秦安得不斂手以乞盟  
乎而二子先沮焉此何心耶齊環之伎也不利晉志  
之得也向戌之偷也隱然有不敢得罪于秦楚之心  
橫亘于中也是故悼公甫沒而高厚早歌不類之詩  
向戌亟獻弭兵之策二國之情畜之已久特畏悼之

威而未敢發耳幸而晉之勢猶盛而秦無楚援不足以逞也藉其不然乘解散之人揜歸師而迫之豈徒晉受其毒哉出函谷以窺三川潰散者不可復收而天下之傾危在旦暮矣二卿之肉其足食乎彭城之師覆而陳遂喪淮南九節度之軍潰而唐終失河北危矣哉故杼閔之罪不勝誅非但怠慢之愆已也

大夫盟

創業者之所為非後人所得而效也善守成者以我



之不可學前人之可時移事變而弊不生若夫效之者拙而以成乎弊乃以咎作法之涼過矣湟梁之會荀偃怒大夫盟在會諸侯不能為政傳者推其原于悼公之委三會於大夫亦設身而為悼公思乎八年之內九合諸侯急于制楚救鄭而勤列國之君于道路諸侯即不憚勞而悼公之心固不寧也楚退鄭服諸君之存僂心必矣猶使其終年奔走躬聽命于道路君疲民勞國且不堪矣不欲重勞友邦之君使其

大夫聽命而公獨親之則又自嫖而失主盟之體乃  
當日六官之長皆民譽也公控御之得其道而諸大  
夫弗敢挾迎立之功以相亢賜六轡在手唯其所使  
以拒吳而討秦在公為之固自有張弛操縱之權焉  
委之大夫也何傷平公嗣立乍有事于中國未嘗煩  
諸侯之奔走而才又不足以御先世之舊臣無先君  
日馭戎路以馳驅之成績而但效其休息以靖天下  
之成局平公之拙也非悼公之咎也或曰明主之制

法非但我所可行也必豫謀子孫之不若已而早為之制悼公不慮後嗣之不已若而早為之所安能辭其咎哉是固然矣乃大有為者之輯寧內外也有序而不可迫晉失伯三世矣其急在外則攘楚為當日之先務且功名不立諸侯不順而欲早行威令于國中望輕而下國不服夫悼公亦且遲回以思待楚鄭吳秦之難皆已平矣然後徐取國中之定分而整飭之未晚也公之立也年方十四三駕之後猶在壯年

使天假之年必有漸張之權消旁門倒持之釁者而不虞其早折也晉明帝速天而蘇峻叛周世宗早殂而趙宋奪天也非人之所能為也君子方為悼公深惜焉而豈忍取後嗣之不振以過責之

公會晉侯宋公衛侯鄭伯曹伯莒子邾子滕子薛伯杞伯小邾子同圍齊

穀梁曰諸侯同罪之病也以圍而書同起特筆焉非病之明矣胡氏責齊環之背盟棄好宜得同罪也而

諸侯之背盟者衆矣傳固曰春秋不貴盟誓齊之罪  
豈獨在背盟哉齊之加兵於諸侯經無所見其屢書  
者伐魯耳齊之罪在伐魯而春秋惡之亦在伐魯非  
但為宗國恤也魯不能霸而霸倚為重輕魯不能勤  
周而周與為存亡者也明德之後秉周禮而以文教  
重于天下是文武成康之靈所憑依而五帝三王之  
道統所維繫者也故欲得天下諸侯者必先得魯魯  
之去來不敢以兵爭之而但以德綏之故晉文興而

不問戍衛取穀之罪晉悼興而先勤士勾士魴之交  
齊侯而欲與晉競也則顧周公太公夾輔之誓孟親  
魯以動天下而猶恐魯之不從乃當其時有不賓之  
楚有不德之吳有逐君之衛有背華之陳蔡有犯大  
之邾莒皆置之而唯魯是求蔑裂秉文之國以矜夸  
詐之雄諸侯羣起而致武豈魯之勢能得此于天下  
哉冠帶詩書之望國人心不死未有忍視其陸沈者  
也符堅不聽王猛之諫而風鶴奪其魂魄拓跋暉其

飲江之志而佛狸死于郊年盛衰者時也存亡者數也聲容文物文武之統緒所繫而不可凌者理也一人倡之衆志翕然而興雖悍且凶折之崇朝而隕落矣同者不介而孚豈有爽乎

取鄴田自鄴水

穀梁曰軋詞也其文隱幾不可解范甯曰軋委曲隨鄴水言取田之多鄴水入東海入于泗經數百里安能盡取之乎公羊曰鄴移也北方之水徙決無恒魯

與邾舊以濞為界至是濞移而入邾疆魯乃隨其所  
移指為已境而奪邾田故書自濞水以著其罪然所  
取者魯邾疆域之一曲耳故當以公羊為正

衛甯喜弑其君剽

君臣以義合審之于先而弗能改于其後者也合則  
無所逃于天地之間矣生乎逆亂之世非其君不事  
其不事也則不可一日立乎其廷故張良以匹夫擊  
天子而不名為賊既已為君則不可他日而易其志



故王彥章事篡立之朱溫為之效死而可名為忠食  
人之祿執人之政而謂君非吾君也其心先喪矣甯  
殖惡死後之惡名而屬其子甯喜承其父之亂命而  
敢于弑其心曰是非吾君而衍吾君也將誰欺皮冠  
之見小過耳而殖敢行其大逆喜而欲蓋前人之愆  
維有避位出奔舍剽弗君而聽國人之迎故主耳乃  
殖死七年矣懷姦以事剽尸祿以專國知衍之勢終  
不忘情于入而內有母弟外有賢臣以為之援乃身

犯大逆加刃於所翼戴之君其惡不可矜其死不能  
逭矣春秋舉弑君之刑以加之其罪定也又書殺其  
大夫甯喜以衍之陰殺而陽任之失人君之道也豈  
得以子大叔置君弗定之小失為喜薄責乎罪莫大  
于弑廢立其次也

叔孫豹會晉趙武楚屈建蔡公孫歸生衛石惡陳孔魚  
鄭良霄許人曹人于宋

宋之會滕邾之君與焉杜氏以謂私屬而略之小國

畏征賦之繁難而請屬於大國不得已之情宜矜恤而存之何忍遽沒之乎于此見春秋正名之深意有所略以存君臣之大分與晉文召王之沒而不書同扶人道以立大綱所謂非聖人莫能修春秋也會盟者國之大事君弗躬親而委之大夫以執牛耳諸侯之不自強可閔也既已使大夫主之邾莒雖小自可視曹許而使其臣以聽命乃甘屈于大夫之下從而受盟愈可閔也春秋欲伸滕邾之君于晉楚之上則

南北弭兵之大故大得大失之所係不可使滕邾任其功罪欲序之于孔魚良霄之下則倒冠于履下而君臣之大分亂而不可理故不得已而沒二國以存天下之綱大夫辱諸侯也諸侯自辱也天尊地卑之大義先王建侯之大法不可辱也此聖人之深意也衛侯之弟鱄出奔晉

能制國之謂君能尊主之謂臣能定是非審利害原始要終守貞而不違于道之謂信逢君之非導人之

逆堅護其不道之言以為信信而賊矣衛侯行之要  
甯喜曰政由甯氏祭則寡人失政而何以有國此之  
謂君不君鱣受命而以與甯喜相期許此之謂臣不臣  
喜伏其辜而怨衛侯失要約之言悻悻以去不義之  
信此之謂不信要其君以政與人君不從而鱣曰君  
不信父逐君而子欲擅國殺之非不當罪而鱣曰君  
無刑然則苟全鱣硜硜之言以千乘之國十餘代之  
世守舉國之生殺盈廷之黜陟邦交之離合財賦之

出內兵戎之動靜一惟喜是聽而衛侯歛手以聽命  
鱣之言踐而後可不失其君臣兄弟之彛倫以立乎  
廷而不去哉喜專之衍固不平之衍不平而喜怒又  
移于衍弑剽之刃且加于衍鱣又何以保信于其君  
也夫鱣而果不惜為亡公子以靖乃心則祝宗告亡  
之日何不去而待之殺喜之後乎穀梁子曰是亦弑  
君者也以鱣為喜之黨也其論正也又曰鱣之去合  
乎春秋春秋其獎亂之書以與聞乎弑君者為合耶

變文書弟使與秦鍼宋辰等蓋惡其守私要而忘親背君以逃也

豹及諸侯之大夫盟于宋

一人一事而再見則畧其氏修辭之體然也豹之不氏二氏以為違命而貶之夫其所命者何也季孫欲使爭承小國之賦視滕邾也魯以周公之胤千乘之國為周室之大宗有先王之景命在國之所以立也乃欲視滕邾而為人私屬沒于利而棄禮以自卑庶

恥道畧以貽四鄰之欺削宗國之望蔑先王先公之  
世守使其命出於魯君且可以義裁之而況其為季  
孫宿削國以自殖之私意乎夫邾為魯之附庸君以  
字稱大夫比于微者其來舊矣滕本侯爵自替而從  
子男之賦則天下諸侯皆子之春秋亦因而子之此  
鄙嗇而自墮其令緒之覆軌也魯有血氣者而忍耐  
之乎豹之不從義也何貶也夫修辭者必有體雖讀  
者不厭其繁雖聖人亦何異于人哉取而巧說之以



為褒貶之案蓋亦未之思也若公羊謂衛石惡為惡人之徒在是而危之一石惡何足以辱諸國况乎魯非主盟尤不任咎言愈鑿義愈誦矣

吳子使札來聘

有一人之行有一國之政春秋者紀國政之書不舉一國之大政而以論一人者也一人之生平有邪正一事之行止有得失春秋者紀事之書不取一人之生平于一事而論之者也故管仲蘧伯玉子產史魚

衛公子荆皆聖人之所與而不搜其遺事以附見于  
經子西之卑賤衛豹之姦賊皆聖人之所惡而不著  
其名氏以顯其惡責臧孫之竊位而告糴不加之貶  
嘉甯愈之愚不可及而來聘不特為褒吳札之來聘  
吳子邦交之事也從乎來則嘉其慕義之例而已矣  
札一使臣雖使德如舜禹亦僅如其事而書之耳而  
傳經者或以為賢或以為責屈一國以從一人舍其  
事之得失而論其人之善惡則春秋非天子之事而

為私好私惡之書同於范曄陳壽之史矣故以為賢  
季札者皆非也而曰責札之辭國以生亂則尤異乎  
聖人之言矣子曰聖人吾不得而見之矣得見君子  
者斯可矣其所厚望于天下者君子也非不願當世  
之有聖人而躡君子以自任為聖則且為無忌憚之  
小人聖人之所深懼也乃欲以非常之事責季札之  
不即奄有吳國而以失節為達節乎季札輕千乘之  
封守世及之義庶幾欲仁而得仁者故夫子稱之曰

延陵季子之于禮其合矣夫而題其墓曰有吳延陵  
君子之墓蓋亦以得見君子為慰也而何貶也僚之  
妄立而不君光之爭國而行弑于季子乎何尤君子  
求諸已而已矣僚光之不肖季歷叔齊之賢非已所  
得而謀也且也僚之頑光之狡伍員要離專諸之為  
亂人不可以理化者也使札而嗣立能保其凜凜壽  
夢之遺命帖然而事我乎順以撫之則彼且為劉渚  
為蕭鸞欲遏其惡則且為宋太宗之于光美德昭也

故曰躡君子而自任為聖則且為無忌憚之小人也  
世儒好為廣遠權宜之論而究為名教之害譙周馥  
道之流皆曰吾達節以止亂也異乎聖人之言而賊  
道甚矣

昭公

楚子麋卒

楚子麋書卒經有明文以為弑者左氏也豈其無徵  
而加人以大惡此有以知其說矣公子圍之心路人

知之矣設服離衛鄰國相與歎之使鄭中返國人固  
驚其必有為也乃入而問疾而麋旋死矣疑之深諒  
之決于是凡楚之臣民竊相告語曰弑也浸乃聞之  
四鄰浸乃傳之簡冊皆曰弑也未有不信其固然而  
左氏據傳聞以決言之不然其赴告也曰病而卒孰  
敢以疑似犯齒人之忌而證其果非病而為弑乎聖  
人傳信而不傳疑存忠恕以消逆億不輕以大逆加  
人從赴而書卒錄其實而已矣幕及平夏駢首受刃

相食之慘雖不弑猶弑也終不以莫須有之爰書名  
之為弑立法審而後亂賊懼不然實弑者且援引以  
反唇譏春秋之過于刻覈何懼哉胡氏謂因申之會  
曲為中國諱夫合十二國冠帶之君羣戴僭王之匪  
人以為盟主斯古今之大變人道之深憂豈必有弑  
逆之惡始足動聖人之悲閔乎言之已深反失之淺  
此類是已

叔弓如晉

常袞辭大官之僎論者謂自顧不能則可辭尊位不  
可辭常祿君子以為知言叔弓衛命修兩君之好晉  
雖盟主以周班言之等之為元侯也以懿親言之魯  
者諸姬之宗國也郊勞有恒典授館有定儀受之而  
非有溢榮弓自揣不足以膺使命則不如弗往既將  
命矣館垣之卑隘子產猶執詞以毀之儼然大國之  
使跼蹐而若弗克負荷不亦隕君命而辱周公禽父  
之靈乎夫弓之恭然畏縮者則有繇矣瀆盟疆鄆弓



實帥師而叔豹戮矣小人無禮緩則行私以犯霸政  
急則辱國以求苟容恭不近禮自恥自辱而叔向以  
為知禮左氏艷稱之彼烏知禮意哉

鄭殺其大夫公孫黑

黑之誅與衆棄之也傳乃以畏強幸疾為上累何足  
為鄭之君與執政累乎子產之善于馭姦也以寧國  
也為岐黃之術者曰因其衰而刺之事長已故石碣  
討州吁不于弑立之際而誘之以覲王之請季友誅

慶父不於再弑之初而乘之于奔莒之時時有所必待勢有所必因也惡不積不足以亡身凶人凶終自有期觀釁而發迎機而立數其罪拒其請尸諸通衢辭嚴義正而國不動搖謀國之善非褊衷之所能測也若必于彼惡方張之日憤焉思逞其不為晉厲之誅三郤魯昭之于季孫陳蕃竇武李訓鄭注之于宦寺者鮮矣然則何以書大夫非有弑君叛國之大惡而上又無王命以討之不削其官法之正也凡討有

罪而書大夫率此義耳

叔弓敗莒師于蚡泉

公羊之說迂而不當多矣而何休又導之以入于詭

誕蚡泉之文三傳所傳各異左氏謂之蚡泉穀梁謂

之賁泉

賁音扶粉反與蚡相近

文雖異而其為魯地一也公羊

謂之瀆泉而曰瀆泉者直泉也直泉者涌泉也既不

可通何休乃云戰而涌出為異象公在晉臣下專受

莒叛臣以興兵百姓怒歎氣逆之致按經言敗莒于

蚡泉與敗莒于鄆敗邾于偃何以異且方戰之時勝者喜而旋師敗者潰而遽走即有泉涌出非江河之決足以渰軍何關於戰且魯既勝矣泉涌為災應當在莒而魯何任其咎牽強天變以立異說休之學蓋識緯之流而公羊實作之備矣

暨齊平

傳以翼經經有微言之難喻則徵之傳經以正傳傳有殊說之難定則稽諸經經之屬辭比事合先後參

彼此而傳之異說可折中矣暨齊平穀梁以為魯也  
左氏以為燕也夫亦孰從定之哉考之經之前後而  
知之矣齊魯自夷儀之後盟會不絕曾無一矢之相  
加遺平者平其不平也固無不平而何平之有于燕  
則前書齊侯伐燕後書納北燕伯于陽則暨平之為  
燕徵矣齊景于是有復霸之心焉故因伯款之奔挾  
義問以致討盖亦欲修桓伐戎辟地之勲也伐燕者  
正也受復而退觀霧而後動為義不終急于平而以

納君待之五年之後偷而不足以有為景公沒于利而墮義晏嬰知其失而弗能強諫齊之所以終不能復霸也故書曰暨授權于燕而抑齊哀其見義之不為無勇也晉既失霸齊又無成拱手而授中國之權于吳越聖人之所傷也宋楚平而晉霸衰齊燕平而齊霸不復曹之卒章傷天下之無霸春秋之情見乎詞尤章章矣

陳侯之弟招殺其世子偃師

招殺世子而稱陳侯之弟以為寵愛之過者非也人之不仁狗牀第之愛至殺其冢嗣而猶能與兄弟相友愛以至于過乎援凶人而授之刃者溺也乘君之昏而逞其凶者招也非招無敢任殺者故溺委其事於招而果成乎殺溺豈有愛于招乎卒之身縊以死愛子奔招之于溺又豈嘗念其愛而有所不忍乎殺世子以自殺而亡其國所謂自作之孽不可活也書曰陳侯之弟招殺其世子偃師謂陳侯之弟殺之即

陳侯殺之也若從常例而稱公子則罪在招陳侯不仁之惡掩矣趙主父楊堅皆以此亡至不仁者亂賊不與分其惡人道滅絕聖人之所閔招之惡不足深論可矣

叔弓帥師圍費

行有不得者反求諸己為君子言也若夫叛逆大惡豈以此責之哉人方以叛人為叛叛人即以責己之叛者為叛叛者惡之黨叛者和之舉國之習于叛而



不覺者從而附會之而叛人乃以叛之名歸之責已者而不忤人以正責已矣不名為叛則不可加之兵不名為討則不可以欺國人而逞已之志亂臣跋扈以上劫主下脅衆固逆黨散義旅者此也蚩蚩之氓何知焉驟聞兵戈之猝起驚相告語斥之為叛不幸功隳而死亡遂傳之爰書傳之告赴曰彼叛而我平之叛人之名反受而不能辭君子原初終正大義伸孤忠抑橫逆不以成敗論人豈其然乎若叛人之所

叛而亦叛之衆人之所叛而遂叛之天下亦何賴有  
君子之名教哉南蒯入費季氏謂之曰叛叔弓討之  
之辭曰叛魯人因自言之曰叛流及于齊齊亦斥之  
曰叛不謂胡氏翼經作傳明聖人之大義而亦以為  
叛也夫蒯之為謀歸室于公以費為臣誼至正也蒯  
謀之慙慙告之公請命而行非擅興誣上之師也季  
氏稔惡不悛盜憎主人而援戈相向此猶可責以仁  
禮存心而厚望之為君子乎或曰蒯幸而成也不能

必其終戴公室而盡其忠也曹操圖董卓操復為卓  
劉裕誅桓玄裕復為玄何為遽許之以非叛哉曰義  
之正者不容先慮其邪而早奪之君子勸忠之至意  
也當其舉國從逆之日而能倡義以起亦奚必保其  
往乎即如操裕之懷慝久矣而當滎陽攻卓京口討  
玄之日從卓與玄之詞而號之曰反又豈可哉故書  
圍費而不書薊叛深惡季孫重貶叔弓之黨惡斥其  
動干戈於邦內而不戢也他日公山弗狃之召子曰

吾其為東周乎聖人之志見矣

楚公子比自晉歸于楚弑其君虔于乾谿

楚康之卒非實弑而春秋從偽赴也于書比弑其君  
虔而益信矣傳以楚未嘗錮比比未嘗不向楚而坐  
責比君臣之義未絕而為弑君者所援立因厚其責  
而目之為賊夫坐之向背子鮮偶恣為之而豈必義  
絕者之皆然晉之以羈抵祿晉為之非虔使為之以  
虔之仗毒雖無錮比之事又豈須臾忘比者哉且即

君臣義絕亦無貴戚而推刃尊親之理傳之于義疎  
矣况乎比以經權失宜而加以不赦之事震以覆載  
不容而沒其元愆之迹春秋非聖人所修也則可春  
秋為聖人所修也何倒置如斯也糜惟實卒故震稱  
君而比書弑比唯實弑故棄疾書殺而比不稱君乾  
谿之獄情得理允而比無可曲解明矣乃胡氏之說  
既然三傳之義又異何論楚獄者之紛紛也所不解  
也左氏既以震為逆賊矣公羊則曰歸無惡于弑立

也穀梁則曰以比之歸弑比不弑也要皆惡虔已甚而曲為比解也君雖不君臣不可以不臣誅虔者有萬世之公說而豈比所得操刃以相嚮乎雖然亦未害為君子詞也何也虔之宜授首于人君子之所快也楚既僭竊虔復窮凶設服離衛既攘臂以奪其主投龜詬天又瞋目而蔑宗周坐致齊犧剪滅上國惡極將隕猶耽于周鼎鄭田恃大城以逼諸侯自楚氛猖獗以來顏之橫旅之疆未有如此日之淫威以逞

者中外喪氣神人共憤久矣君子懷千秋之公怒寬假弑之者以幸其亡亦天理人情之不容已而三傳之說立焉然而非聖人之大法也聖人正名實定刑賞不為己甚者也

意如至自晉

左氏之輕以禮許人不一矣意如逃歸而猶曰以尊晉罪已許之曰禮則亦孰為非禮者哉意如之削其氏族聖人賤而削之也蓋意如者始貪怙以啓釁繼

畏慚而私逃穿窬之行也因其賤而賤之聖人之法  
嚴矣若以為史策之固然則季方專魯誰敢操觚以  
削其族而史藏魯府亦何能以謝罪于晉而修事大  
之禮乎且使魯畏晉自貶而史亦不敢存孤卿之姓  
氏則君辱矣卿執矣與邾莒齒而屈于下矣猶自惴  
惴焉臺隸其冢臣勿敢私尊于國史則辱人賤行不  
足以立國禮者所以強立而不反也而豈其卑柔沮  
器之足云哉此說行而嚙面自乾者且以訓其子孫



士君子之節斬于天下久矣

有事于武宮齋入叔弓卒

易曰見金夫不有躬无攸往有其躬而後可以立身  
可以事君可以治人可以事神可以善生可以安死  
非愛其身之謂也不以身戚君不以身辱國不以身  
亂禮無他利不足以動之而已矣權與勢利之所存  
也怙權勢而不忍失之生以之敗德而誤及國家死  
以之虧禮而羞及鬼神叔弓蒞事于武宮甫齋入而

仆于廟次其耄老垂盡之氣非一旦矣而不能辭蒞事  
之後非不欲辭蒞事之勞也辭蒞事則必辭其祿位  
弓沾沾而不忍舍雖死而不憚勞故不辭也弓之生  
平趨利而失身久矣疆鄆取鄆為季氏厚封殖而害  
及其君帥師圍費為季氏逐異已而病深于國是以  
得季氏之歡心而倚之為重魯會盟征伐之政恒在  
三桓而弓獨十一見焉迨及病且憊而季氏猶寵之  
以有事之榮以徇之弓亦不惜餘喘以自安其卿位

諱疾忍死至于顛仆昏冒而始知大命之傾不恤其躬  
乃使先公不得享其養曾孫不得盡其誠其死也無  
異于巖牆桎梏矣嗚呼士大夫之喪其恥心也老不  
休病不謝其甚者有父母之喪而不去其官吏嵩之  
張居正楊嗣昌之為名教罪人也不有躬不有父母  
而何有于君哉春秋書籥入叔弓卒醜之也三傳于  
此言禮禮豈為奔金夫以宣淫者設哉

許世子止弑其君買

五刑之屬三千不孝為大然輕重則有等矣違溫清  
定省之常儀而遽加以汚瀦之大法又豈忍哉許止  
之弑斷自聖筆罪較然矣左氏曰飲太子之藥卒公  
羊曰止進藥而藥殺以必與藥有以異乎此逆子不  
刊之定案也而穀梁以為不知嘗藥故備責之見孝  
子之至不嘗藥者子道之不盡謂之不孝允矣而謂  
之弑不已惜乎穀梁此論非以求全於孝子特以曲  
貸于元凶而已是擣附入宮而霍光掩其妻之大惡

紅丸進御而方從哲賞李可灼以金幣之術也穀梁  
何私而曲庇逆止哉蓋止鴆其君父而欲揜之也故  
為震悼號泣不食不飲之態飾其惡而免于討凶人  
之涕洟無情而泉涌者多矣踊擗呼號尤易為也飲  
食則無從察之于曖昧也人不察而或疑其為無心  
之過傳聞焉而遂僅以不嘗藥聞迨夫鬼神弗赦魂  
喪神驚畏臬礫而走晉以死天殛之也乃謂之毀死  
而穀梁信之僅以不學責之然則劉劭崩崩破裂之

詔遂可盖合殿之極慘哉然則何以書葬葬者臣子之事君弑而賊不討則不書葬以罪其臣子世子躬為逆又誰責焉故許悼蔡景皆特書塋此處梟獍之法非臣弑其君者等又春秋之大法也

盜殺衛侯之兄縶

左氏書縶公穀書輒音相近而亂未知孰是要之皆名也穀梁乃謂兩足不能相通謂之輒輒豈無名而蒯聵之子又豈廢疾之人而亦曰輒乎齊豹稱盜微

之也春秋但責衛侯之不能庇其兄弑不足當春秋之法也胡氏不審乃舍手刃之盜而蔽罪于與難之宗魯過矣宗魯之不足弔孔子正事主之義以訓門弟子非春秋正名定罪之大法也

劉子單子以王猛居于皇

猛不稱子猛不得為先王之嗣也猛之書名猛不得為天下之君也其稱王猛者王國不可言周從乎鄭忽曹羈之例而繫之王亦猶王人王姬之稱王也猛

非次當王者乎曰猛長當王也景王立朝之命正乎  
曰不正然則猛何以不得為景王之子而君天下耶  
曰立子以嫡無嫡立長天下之公義也君無正命廢  
長立幼大宗得而持之大臣得而斷之賢士大夫有  
口匹夫匹婦有心可得議之非為子者所得挾之以  
自爭也義無定在存乎其人故曰義內也非外公  
叔文伯之惡母數之則為賢母妻數之則為妬妻存  
乎其人而已矣漢武帝之立昭帝非義也而燕旦抗



表入侍則自取誅夷唐太宗之立高宗非義也而承  
乾封事詐上終以幽死蓋父能制命為慈子以承命  
為孝父不慈子不孝雖與之天下不能一日居也猛  
虞人倫之變父既嬖愛弟又擅私雖欲不為西山之  
遁採藥之行其可得乎或曰伯夷泰伯之至行不可  
責之中材以下猛非大賢何責備焉曰人倫之大唯  
有至者是方員之規矩也道二仁與不仁而已矣不  
為伯夷泰伯則必陷于大惡無中處之餘地也奪其

子之稱而不以天子之尊尊之聖人之為萬世父子  
法也公羊氏以稱王為當國之辭國誰之國自謂當  
之而遂許之當乎然則敬王亦無父命而何以天王  
之稱予之耶曰猛已卒朝已逆晉楚各挾已爭劉單  
尹召交訐於內天位久虛四海無主敬王雖非父所  
欲立而亦非父所不欲立者也以靖國家之難據正  
而承祚夷齊皆逃而中子立中子不得不立也國為  
重則尊之焉可矣其于猛也生則絀其子之稱以立

思子道也兄道也卒則稱子以明景王之私子朝之篡父道也弟道也王敬王之號而不貶劉單之爭君道也臣道也聖人之權衡精矣故曰聖筆如化工

有鸛鵒來巢

鸛鵒之異自南而來北宜穴而營巢二傳所論正矣而左氏復實之以童謡彼師已者無乃意如之黨援天徵物附益之以為理數之自然而非意如之逆天以行惡也叔詒之卒情見乎辭矣乃述之紀載將使

天下後世謂國之治亂安危定于五百餘歲之前而  
非由人造則春秋紀異本以立恐懼修省之教而為  
此說者使人委于命以聽庸主之急荒姦人之縱恣  
也左氏好異而亂常若此類者衆矣讀者所宜辨也  
黑肱以濫來奔

黑肱不繫國闕文也春秋之為闕文也不一仲孫忌  
晉魏多皆闕也而公穀恥其所不知必曲為之說于曼  
多何忌則曰春秋譏二名以啓王莽之妄而貽辱于

勾奴于黑肱也穀梁則曰別乎邾而為不受封于天子之國公羊曰天下未有濫足以辨其非矣而抑曰黑肱為賢者之後而推以通之則尤迂僻而不通黑肱之祖叔術而果賢也亦無因事而通其後人之法畢公高散宜生之賢其後人不見于春秋即當時為夫子所推予者蘧伯玉管仲子產而亦不借事以特書何獨於叔術而有特筆況其所傳叔術妻嫂逆命二子嬰稚爭食之說穢亂猥瑣尤為君子所不屑道

者乎胡氏有曰曲為之說則鑒矣鑒者君子所惡以不知而為知學者之大戒也

仲孫何忌會韓不信齊高張宋仲幾衛世叔申鄭國參  
曹人莒人薛人杞人小邾人城成周

王事之闕霸事之資也故曰詩亡然後春秋作有子  
顏之釁而齊霸以興有叔帶之難而晉霸以起猛朝  
之亂亦晉霸已衰而復振之幾也晉自平丘以後文  
悼之世業衰矣成周之城合十二國以戮力于王室

無敢違者自是而十年之後諸侯之戴晉者猶昔也  
無私要之會盟無相攻之侵伐而秉安輯維京斥絕  
庶孽之後大會于召陵以將問罪于楚雖以久相携  
貳之陳蔡從未賓服之頓胡亦牽帥以從而中國之  
勢較桓文而尤盛甚哉大義之在人心不可泯而鼓  
舞之權莫大於此也春秋備紀大夫之名氏不書盟  
于狄泉而特大書曰城成周序其績以見天下之綱  
維所繫之重也傳者弗為之表章畧矣嗚呼以頃定

之懦也魏舒韓不信范鞅之鄙也一修勤王之節而天下景從之也如此況秉忠志義以大有為於當世者哉項羽拔山蓋世之威而縞素一臨摧之如拉朽苻堅投鞭斷流之勢而正朔所在自潰如驚麋天下之大百年之永人心猶故而興起于晦昧之中安得謂遂無其人哉

公薨于乾侯

昭公客死之歲夫子已將及彊仕之年目擊式微之



痛而自叔梁大夫通籍于魯為世祿之家則君臣之  
義定焉故陳司敗知禮之間引咎于已而諱公之惡  
盡臣道也然則乾侯之計有愴聖心深可知矣書曰  
公薨于乾侯傷之甚憤之甚情見乎詞矣傳者以昭  
公不君季氏不臣並舉而分譏之事何異于司敗之  
直而無禮以傷聖人之志哉君之不君客死于晉土  
其效也不待言而不忍言矣且昭公之討季氏詎可  
盡責其不君乎智短謀疎未嘗不有自貽之咎然較

之娶同姓之惡則不侔矣于彼諱之而于此罪之耶  
君臣不坐為天子方伯者且辨以其分而畧其曲也  
况聖人之心乎書公圍成望之也書齊侯取鄆幸之  
也書鄆潰傷之也皆聖人忠憤之所托也史墨之言  
曰社稷無常奉君臣無常位政在季氏于此君也四  
世矣此亂賊之黨所以搖人心而滅天理墨蓋借魯  
以曲媚趙鞅為篡弑之地者傳者引之以釋聖人之  
經何其迷於邪說而不思也利口之覆邦家其史墨

之謂與

定公

春王三月

定公元年無正月不忍遽絕乎先君也昭公雖薨而殯未返定公雖嗣國而未立故喪至自乾侯書曰公不曰先君至戊辰而始以公之號加于定公明此三月猶昭公之月非定公之月也故從乎凡紀繫春于三月不忍使臣子遽忘客死之先君聖人之痛深矣

傳以為不正定公之始者非也定何不正之有哉定之立非篡也務人之廢季氏之畜逆已固結而不可解盈庭皆季氏之孚而定公以介弟孤立處危疑之勢擁之而立而猶謙讓以不決則國非其國而主祭已久之季氏亦何所不至乎定公立而魯之公室猶有統焉社稷為重非可以處常之道論正始正終也

立煬宮

祭仲孫林父甯殖皆嘗逐君矣而猶必立君以不敢

專季氏逐君曠大位而已主公之祭其欲代魯之心  
無所逃罪矣特以生不當田和趙藉魏斯韓虔之時  
天下未有而不敢創也乃既已賂結齊晉而免人之  
責矣所難以欺人者恐鬼神之未佑也於是禱于煬  
公以錮昭公之復國且知昭公之客死已可坐而待  
之也而果客死矣于是歸功于煬公曰此先君之意  
也先君許我而無恫于神可無惡于人矣故立煬宮  
以昭已之得佑于先君也是王莽金匱之術也意如

不死家臣不叛定公之不為孺子嬰者幾何也春秋  
書立蜎宮以誅其誣神欺人之大慝傳者薄責之曰  
不宜曰非禮豈足以盡其惡乎

蔡侯以吳子及楚人戰于柏舉

師曰以能左右之也進之緩急唯其謀退之遲速唯  
其意兵之深淺唯其志敵之縱舍存亡唯其命敵納  
歟唯已受之俘其人畧其地唯已有之而為所以者  
聽命焉故能以人者必其能制人而使左使右也蔡

何能以吳哉沈玉而濟志在報楚而未知何人之可託也求晉不克而求之吳伏以聽命尚惴惴焉恐吳之不我攜焉吳則與楚相持者數十年其思吞楚也久蔡偶挑之而動以速耳豈果為蔡而興師乎半濟而擊非蔡謀也五戰及郢非蔡力也夾漢之陳處宮之穢鞭尸之慘蔡無與焉蔡何能以吳哉春秋冠蔡于吳之上而歸以之權于蔡不與吳之成乎霸也蔡以霸待吳吳以霸自命君臣相率以憂中國為名責

隨之容納楚子而以漢上諸姬為辭皆霸者之成局也自此而徵會爭敵窮兵以逞於中原不但霸而且有代周之志矣故聖人亟奪之而使蔡以之若曰此蔡之以懲楚而報其毒者也吳特唯其鞭弭之是從耳晉侯召王而書曰天王狩于河陽存天子之體也楚師救晉伐齊而曰公以吳師救蔡伐楚而曰蔡以者奪其霸也春秋奪楚而尤奪吳吳之為豕為蛇甚于楚也傳謂善伐楚解蔡圍則元之滅金為宋報二



帝之讐亦將與之乎楚不滅蔡蔡必折入于吳吳其可終恃乎若謂予吳以罪晉在召陵書侵以陋晉罰不重施何必于此而申其責也

從祀先公

從祀之典三傳皆以為反文公之逆祀而順之從猶從衡之從直也胡氏獨取馮氏之說以為始祀昭公于廟從者祔于祖而後列于昭穆也定公于閔僖親盡而祧矣僖宮以季氏之私而存閔則毀矣于是時

也魯方有內亂而何暇及于閔僖之順逆則馮氏之說允矣陽虎之為此也所以奉昭公而揭季氏之罪以為兵端也故胡氏謂其事順情逆出陽虎而不可詳然而陽虎之為匪人一人之善惡也昭公之當祀千秋之分義也論人者核其微定禮者重其大不相掩也君子不以人廢言而況于宗廟之大典君臣之大分褫權姦之慝申孤憤之志顧可以人廢之乎昭公之出非鄭突之篡衛行之驕燕款之私昵莒庚與

之殘忍也國柄旁移主臣倒置國非其國辱及先公  
不容不激起而申天討特其作之無序輔之非人謀  
之不審以至于敗耳身死異國而魂魄倚于宗邦是  
臣民之所不忍忘而祖考之欲共其歆享者也虎之  
為此必昌言于廷請命于君上告于羣公則非虎之  
私為之而魯之大政也何為而不可詳耶孔子之溝  
而合諸墓聖狂雖有霄壤之隔其為人心之公義一  
而已矣如謂必待其人而後可行無文王則不可饗

親非武周則不可饗帝乎必待孔子而始修昭公之  
祀則使定公不能用孔子而女樂之歸早速孔子之  
行昭公永為無祀之鬼而三十年之國祚中絕定公  
亦何所受而君國乎書從祀者仲昭公以記魯之終  
合乎禮許之也亦幸之也奚問其為陽虎哉不書禘  
嫌于譏其僭書于竊寶玉大弓之上偶相屬而已陽  
虎叛季季氏逐君罪有輕重不得仲季以抑虎也

晉趙鞅入于晉陽以叛

傳經已僻遂以開無窮之禍無有如公羊以清君側之惡曲庇趙鞅者一言而毒流萬世為名教之罪魁亦酷矣哉劉滂以鼂錯為名王敦以劉隗刁協為名蘇峻以庾亮為名垂及于宸濠寔鑄而不息挾篡之情稱兵犯闕宗社丘墟橫尸載道皆此言啓之也叛逆之情無所不至而猶有所顧忌者以犯天下之大惡人無與助天下萬世且操公論以推其後也此言出而亂臣賊子公然正告于天下曰吾以效忠于社

稷而莫生民則貪者濟其欲忿者逞其恨逆者成其  
謀而人之從逆以為梟獍者皆有所挾以為之用甚  
則愚忠愚孝惡執政之病國不審而從之以陷于惡  
身死名滅為天下笑公羊氏之遺禍豈有窮哉以趙  
鞅論之荀寅士吉射惡也鞅亦惡也寅吉射在君側  
鞅亦在君側也互相噬以自強為吞晉計耳相與撓  
晉而濁之奚其清乃公羊之為此說也有所授之也  
戰國之世荀范之族斬矣趙氏篡晉三分而獨強武

靈之威名平原之虛譽足以籠致橫議之處士而文  
其先世之惡以冒為忠順邪說倡而公羊起于其後  
因襲而承之不知其為綱常之害至此極也道聽流  
俗之言以誣聖人之經教禍乃如此其烈可不懼哉  
春秋等三卿而書曰叛大義昭垂亂臣賊子之所懼  
者在是公羊之說興而懼者泮然自釋矣君側有惡  
而負險擁兵矢石加于宮闕以自命曰清側亦孰不  
可為也

晉趙鞅歸于晉

趙鞅之叛據土阻兵樹援要主惡莫大焉公羊氏既以除君側之惡文其奸其歸也穀梁氏又曰貴以其地反也許改過也何其為賊所愚而庇之深也鞅之歸果以地歸君乎抑仍擁為己有乎延及繼世尹鐸為之保障無恤據以自安沈竈產鼃而戴趙氏以不離晉陽之終為鞅有明矣歸國之後置先世之霸業于膜外而日尋于干戈以與荀范爭鄭衛交起而加



兵于霸國失魯媚吳瓦解桓文匡定之天下惡孰有  
大於鞅者邯鄲遠絳而晉陽近又入國而挾君以逞  
則又孰在君側者二傳何此之不察也鞅之歸也惡  
以稔也奚改之有春秋書歸傷晉之無君而逆臣復  
入之易爾大義立而傳亂之邪說橫行日星為晦悲  
夫

如氏卒

母以子貴非道之宜也子不得以其貴加諸其母而

亂先君嫡妾之分也然春秋之世成風敬嬴嘗僭矣  
春秋因其僭而書夫人書小君志其失以記亂防之  
始然而生養死葬有可致其厚弗損于禮而可異于  
先君之他妾則不禁其厚而薄者為不仁矣如氏定  
公之媵哀公之母其卒也當定公在殯之際哀公尚  
未改元而即位故褒崇之典不行猶然從妾例而不  
得以夫人小君之稱加之言卒而不言薨然視之他  
妾得以卒書則歛含奠葬之儀必有加焉者矣庶幾

乎得情禮之中也公羊曰未踰年之君也其說是矣  
左氏以為不赴不祔不成喪不赴何以得書妾母祔  
于庶祖姑何以不祔不成喪何以書葬是哀公過薄  
其母而春秋因削其秩獎天下以薄矣夫豈其然

哀公

齊國夏衛石曼姑帥師圍戚

處天下之大倫守天下之大正定天下之至變執天  
下之至常道二仁與不仁而已矣無專計也心安而

理得矣懷不定之心襲孝慈之迹相率為偽而天性  
蔑矣蒯賁衛輒之事亘古未有之變也斷斯案者夫  
亦何所容其委曲焉公子郢辭靈公之命決矣靈公  
彌留之際未嘗有遺命以拒亡人輒之於此處之亦  
易矣權主器事涕泣以告國人亟請于晉迎蒯賁以  
歸位固蒯賁之位而胡氏曰避其位以讓之非也且  
子于父固不可以讓言也輒以其誠而迎父以居應  
有之位義正而辭嚴南子之黨其孰敢執異說以相

撓者即使其怙邪不悛終拒蒯賁而不聽輒亦惟有  
棄苦次而逃從蒯賁于外靈公不患無喪主衛國不  
患無嗣君已之性盡而於人乎何求終身訢然忘衛  
國而為亡公子于外夫子所謂求仁得仁而無怨者  
謂此出乎仁則入乎不仁非夷齊則為臯獍更無所  
容轉計春秋書石曼姑帥師圍戚其為臯獍明矣而  
公羊曰不以父命辭王父之命違聖人之正訓以殘  
賊天性必此言夫胡氏抑曰辭其位以避之則衛之

臣拒蒯賁而輔之可也假飾為偽以巧售其賊心使天下後世笑儒者之心跖而行夷以欺天下皆此等啓之也誠偽之分人禽之別名者實之賊也奈何君子之徒而為此名也

晉人執戎蠻子歸之于楚

十室之邑可以避難勢不惟其強弱惟其人而已晉之歸戎蠻子于楚傳譏其不競夫亦思其所以不競之故乎晉雖失諸侯楚亦國亡而僅存之餘也惴惴

然聞通于少習之說而獻逃死相依之戎子以媼楚  
豈果畏楚之已甚哉趙鞅之言曰晉國未寧情見乎  
詞矣所謂不寧者非外侮也荀范之欲入而已夫孰  
使晉之不寧者鞅自不欲寧晉耳寅吉射而入猶鞅  
也鞅安其位以據晉猶寅吉射也皆晉之足以亡者  
也而鞅為甚寅吉射而入焉晉之禍或緩于鞅趙氏  
自盾以來窺晉而欲篡之非一日矣寅吉射而入則  
趙氏屢世之姦謀以敗則所云不寧者趙氏之不寧

非晉不寧也全戎子以抗楚楚通少習而晉自可以  
據河山而與之爭勝特鞅南拒楚則齊鄭衛挾荀范  
自邯鄲以乘虛而入盾之不在諸侯武之彌兵皆是術  
也鞅他日之不能以抗吳而讓之長者亦是術也曹  
操通信于孫權劉裕棄關中于勃勃皆是術也一可  
以擅晉而篡之天下聽其瓜分吳楚聽其虎視而于  
戎蠻子何有焉俯首以媿于戎蠻而負之其貌柔其  
心忍其毒深亦至此乎



齊陽生入于齊

陳氏之欲篡齊也數世于茲矣當景公衰老之際而陳乞之謀益亟凡人臣之欲竊國者非先有所廢立則不足以制主而箝服其臣民故乞構景公以逐陽生及荼奪長以立則又挾陽生以弑荼而立之計其廢荼立陽生之日必且執長幼之序以爲名建鼓以告國人曰國乃陽生之國也而後鮑牧之徒唯其所命而不敢爭甚矣公羊之好異而

為巨囊闖然之說幾同兒戲使然則乞不成其為  
姦雄而國人亦且笑其愚而不聽矣華元乘闥而  
語敵齊夫人踊楮以闕客皆謔也謔以釋經不足  
取也固矣

齊國書帥帥伐我

殷高宗英斷有為之主也而用兵或亟易稱三年  
克鬼方而曰億則君子有黷武之憂焉故傳說訓  
之曰惟干戈省厥躬傳者以言魯事則不侔矣魯

之積弱也至哀公之為君季斯之為臣也而益不堪  
國無與立而四鄰睥睨之且將聞金鼓之聲而震  
掉焉敵加于已使借內省以文其懦必益趨于痿  
痺而亡可待矣以曲直言齊以一女子而逞其毒  
進封豕長蛇以相逼曲在齊不在魯也業已請平  
而又間吳禍之方興以采入清泗是尚可斂兵謝  
罪惡縮以受其蹂躪乎是故冉有樊須之賢顏羽  
之勇公為不狃之烈義激于中而思與致命此所

謂田有禽利執言者也而執政忝然無生人之氣  
一子守二子從公禦諸竟善策也而不用一子帥  
師背城而戰勝算也而不能遂巡畏縮使國書一  
旅之師深入無人之境是其非省躬之有闕而哀  
公疑其臣三桓忌其君上下相猜甘誑于人而偷  
全于內故不言四鄙而直書伐我見受伐之深而  
傷其弱也孟子反殿而夫子稱之汪錡死而夫子  
使弗殤之冉有用矛而夫子義之聖人之情見矣

非可以規高宗者益魯君臣之憚畏也

公會晉侯及吳子于黃池

荆吳徐越以僭王故而絕之于中國蓋天無二日萬古為昭而列國雖各君長其邦必奉一王而安于侯服封建之所以一天下而不可廢也聖人之大寶曰位雖名也實天經地義之所存矣楚之稱王齊侯攘之而陞亭之詞不訟言其僭蓋彼桡然自大君臣相怙之已久不能以片詞折也然桓公之所以不能定

天下之亂者在此名義在人心而不泯誠使昌言以  
使革其偽亦庸詎不可以奪其魄哉夫差之凶悍視  
楚為甚而黃池之會晉曰命圭有命固曰吳伯不曰  
吳王夫差終以伯自居而不敢以王臨晉夫豈晉定  
之為君趙鞅之為相威逾于齊桓而制之哉義不可  
泯于人心雖桀驚者勿能倔強以爭也或疑晉之爭  
長無力姑借是以釋慙而墮其霸業于是謂稱及者  
為會兩霸之辭以哀晉之失霸夫失霸之與失王也

孰大奪其王而即予之以霸不猶愈乎太伯為文王之伯父吳為諸姬之長亦可有辭而何慙之有乘其爭長之機餌之以不成霸而禡其久僭之王趙鞅此舉差快人心宋爭獻納未能如此之得也故鍾離祖向皆言會吳而此言及及者我為志幸晉志之伸也然則何以稱吳子而不稱吳伯非吳之能自為不遠之復奪于晉之直而姑自抑稱伯則善在吳矣名義可以折強暴雖以趙鞅之無能為而名以正抱志義

者何憚而不危言哉


西狩獲麟

公羊反袂霑袍之說未可盡非也感于麟而作春秋  
故至獲麟而止不然則文成麟至正可奉天命而終  
其事奚為絕筆哉曰以天道終者亦感麟之謂也麟  
為王者之瑞春秋天子之事聖人不得已而代王者  
以行其賞罰明王不作天命聖人作春秋以昭示萬  
世萬世之幸非聖人之幸也聖人知天道之在已而



抑念天道之不集于帝王之躬亦以感天道之變而示春秋之合天豈一承天瑞遂矜天道之已屬乎乃若胡氏之言抑有說矣胡氏之為傳也當高宗南渡之初宋室之不振甚矣庸君懦相問天而疑天不可問以為氣數在天非人之所能強爭故安於割地請和而志不帥氣故言苟有其德正大分辦大開昭大義檢大倫則匹夫操南面之權天且以王者之瑞應而亂無不可撥治無不可反鼓舞高宗之志以折汪

伯彥黃潛善之姦此胡氏忠君衛國之深情無疚于  
聖人之旨而抑以尊崇聖經為聖人之天道闢王安  
石斷爛卽報之邪說君子之立言固有如是者唯其  
時而已矣



春秋四傳質卷下